

Шайтон инсон учун очик-ойдин душмандир



19:00 / 23.04.2024 1481

Аллоҳ таоло Қуръони Каримда шундай марҳамат қилади:

﴿قَلِيلًا إِلَّا لَيْتُمْ إِنْ وَتَطُّونَ بِحَمْدِهِ فَسَسْجِيْبُونَ يَدْعُوْكُمْ يَوْمَ﴾

«У Кунда Ул Зот сизни чақирур. Бас, Унга ҳамд ила жавоб берурсиз ва (дунёда) фақат озгина турганлигингизни гумон қилурсиз» (Исро сураси, 52-оят).

Ҳа, қайта тирилиш маҳшар куни бўлади. Ўшанда Роббил Оламин Одам Атодан тортиб, қиёматгача яшаб ўтган ҳамма халойиқни чақиради, уларнинг ҳаммалари «Алҳамдулиллаҳ, Алҳамдулиллаҳ», дейишдан бошқа жавоб бера олмайдилар. У куннинг даҳшатидан ҳеч кимнинг оғзига шундан бошқа сўз келмайди. У куннинг даҳшати шунчаликки, уни кўрган ҳар бир одам «Бу дунёда ҳеч қанча яшамаган эканман» деб ўйлаб қолади.

Шу ерга келганда, охиратни, қайта тирилишни инкор қилувчиларни эътиборсиз ташлаб қўйиб, хитоб мўмин-мусулмонларга қаратилади. Пайғамбар соллаллоҳу алайҳи васалламга уларга мурожаат қилиш топширилади:

﴿٥٣﴾ مُبِينًا عِدْوًا لِلْإِنْسَانِ كَمَا أَنَّ الشَّيْطَانَ إِنَّ بَيْنَهُمْ بَرَزَخُ الشَّيْطَانِ إِنَّ أَحْسَنُ هِيَ الَّتِي يَقُولُوا لِعِبَادِي وَقُلْ

«Бандаларимга айтгин, улар энг гўзал бўлган нарсани айтсинлар. Албатта, шайтон ораларини бузиб турадир. Албатта, шайтон инсон учун очиқ-ойдин душмандир» (Исро сураси, 53-оят).

Мўмин-мусулмонлар доимо энг гўзал ва энг яхши, энг ширин гапларни айтсинлар. Бу билан улар яхши натижаларга эришадилар. Энг муҳими, шайтоннинг шарридин сақланадилар.

«Албатта, шайтон ораларини бузиб турадир».

У бу ишда қабиҳ, қўпол сўзларни, сўкиш ва аччиқ калималарни ишга солади. Шу билан мўминлар орасида низо чиқаради. Агар мўминлар доим энг гўзал сўзларни ишлатсалар, бу низолардан холи бўладилар.

«Албатта, шайтон инсон учун очиқ-ойдин душмандир».

У душманлигини ҳеч ҳам яширмайди. Шунинг учун инсон доимо унинг душманлигидан сақланиб туриши керак.

﴿٥٤﴾ وَكَيْلًا عَلَيْهِمْ أَرْسَلْنَاكَ وَمَا يَعِدُكُمْ بِشَأْنٍ أَوْ يَرْحَمُكُمْ بِشَأْنٍ إِنَّ يَكُونُ أَعْلَوْ رَبُّكُمْ

«Роббингиз сизларни яхши билувчи Зотдир. Хоҳласа, сизга раҳм қилар, хоҳласа, сизни азоблар. Ва сени улар устидан қўриқчи қилиб юборганимиз йўқ» (Исро сураси, 54-оят).

Эй бандалар!

«Роббингиз сизларни яхши билувчи Зотдир».

Қиёмат куни ҳамма бир хил бўлиб, титраб-қақшаб, фақат Аллоҳга ҳамд айтишдан бошқа нарсага тили бормай тургани билан, Аллоҳ ҳар бир банданинг кимлигини, нима қилганини ипидан-игнасигача яхши билади. Ҳамда ўша яхши билиш илми асосида ўз хоҳишига биноан тасарруф қилади:

«Хоҳласа, сизга раҳм қилар, хоҳласа, сизни азоблар».

Ҳа, бу дунёдаги ишларни ҳисоб-китоб қилиш, уларга яраша мукофот ёки жазо бериш Аллоҳ таолонинг ишидир. Пайғамбарга эса Аллоҳнинг таълимотини бандаларга етказиш топширилган, холос. Эй Пайғамбар:

«...сени улар устидан қўриқчи қилиб юборганимиз йўқ».

Сен уларни қўриб, мажбурлаб, иймонга киритишинг талаб қилинмайди. Уларни огоҳлантириб қўйсанг, бўлди.

«Тафсири Ҳилол» китоби асосида тайёрланди